

**Meerartaarnermut atatillugu Nunatsinni tulluarsakkamik
aningsaasaateqarfiliornissamut periarfissanik misissuinissaq siunertaralugu
Naalackersuisut suliffeqarnermik suliaqartunut isumaqatigiinniarnissamik
aallarnisaanissaannut peqquneqarnissaannik Inatsisartuni aalajangiiffisassatut
siunnersuut. Meerartaarnermut atatillugu aningsaasaateqarfiup akissarsiallit
tamakkerlutik maanna ullormusiaqartitsinermit pitsaanerusumik atugaqalernissaat
qulakkiissavaa**

Inatsisartunut ilaasortamit Naaja Nathanielsenimit, Inuit Ataqtigiit, saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerseqarnissaanut saqqummiunneqartoq

Ataatsimiititaliaq sularinninnermini ukuninnga inuttaqarpoq:

Inatsisartunut ilaasortaq Jens Imanuelsen, Siumut, siulittaasoq
Inatsisartunut ilaasortaq Gerhardt Petersen, Atassut, siulittaasup tullia
Inatsisartunut ilaasortaq Evelyn Frederiksen, Siumut
Inatsisartunut ilaasortaq Per Berthelsen, Siumut
Inatsisartunut ilaasortaq Naaja Nathanielsen, Inuit Ataqtigiit
Inatsisartunut ilaasortaq Hans Aronsen, Inuit Ataqtigiit
Inatsisartunut ilaasortaq Kuupik V. Kleist, Inuit Ataqtigiit

Ulloq 15. oktober 2013-imi siullermeerinerup kingorna siunnersuut ataatsimiititaliamit misissorneqarpoq.

Siunnersuutip imarisaa siunertaalu

Meerartaarnermut atatillugu aningsaasaateqarfimmik pilersitsinissamut periarfissat misissorneqarnissaat siunertaralugu suliffeqarnermi illuatungiusunut isumaqatiginninniarnissamut Naalackersuisut peqquneqarnissaat siunnersuuteqartup siunnersuuteqarnermini kissaatigaa. Siunnersuut akuerineqassagualarpat sunniutissaa taannaannaassaaq. Meerartaarnermut aningsaasaateqarfiup qanoq iluseqartinneqarnissaani apeqqutaassaaq Namminersorlutik Oqartussat sulif-

feqarnermilu illuatungiusut erseqqinnerusumik oqaloqatigiinnerat misissueqqissaarnerallu. Aningaasaateqarfik suliffeqarnermi illuatungiusunit aningaasalersorneqassanersoq imaluunniit Namminersorlutik Oqartussat aningasanik tapeeqataassanersut aamma oqaluuserineqartussaassaaq.

Siunnersuutip Inatsisartunit siullermeerneqarnera

Siunnersuut maannatut iluseqartoq **Naalakkersuisumit** taparserneqanngilaq, tassa meerartaarnermut aningaasaateqarfik sulisitsisut namminersortut pisortallu allaffissornerannik tassungalu atatillugu aningaasartuuteqarnerannik nassataqassammat. Naalakkersuisut isumaqarput sulisartut kattuffii meerartaarnermut atatillugu tamakkiisumik akissarsiaqarnissamik isumaqatigiissuteqareersimasut qoqassineqartutut misigisinnaasut.

Siunnersuut aamma **Siumumit** taparserneqanngilaq, tassa aningaasaateqarfiup sulisartuinnarnit aningaasarsiakereersunit aningaasalersorneqarnissaa isumakuluutigineqarmat.

Sulinermi illuatungeriit naqisimaneqanngitsumik isumaqatigiinniarsinnaanerannut siunnersuut akulerunnertut taallugu **Atassummit** taparserneqanngilaq.

Siunnersuut maannatut iluseqartoq **Partii Inuit** tapersinngilaat, tamatumanilu tassunga Naalakkersuisut tunngavilersuutaat innersuussutigalugit.

Siunnersuut **Inuit Ataqaatigiinnit** taparserneqarpoq. Tamatuma saniatigut 2014-imi upernaakut ataatsimiinnermi nassuiaammik saqqummiussinissamut kingornalu meerartaarnermut aningaasaateqarfik pillugu inatsimmik 2014-imi ukiakkut saqqummiussinissamut Naalakkersuisut peqquneqarnissaat Inuit Ataqaatigiit kaammattuutigaat. Siunnersuut **Demokraatinit** taparserneqarpoq.

Ataatsimiititaliap siunnersuummik suliarinninnera

Meerartaarnermut aningaasaateqarfimmik pilersitsisinnaanermut periarfissat misissorneqarnissaat siunertaralugu suliffeqarnermi illuatungerisanik isumaqatigiinninniarnissamut Naalakkersuisut siunnersuutikkut taamaallaat peqquneqassasut ataatsimiititaliamit aallarniutigalugu oqaatigineqassaaq. Taamaalillunilu misissuinissaq siunnersuutigineqartoq pillugu Naalakkersuisunik isumaqatigiinninniarnissamut suliffeqarnermi illuatungerisat sukkulluunniit peqquneqanngillat.

Tamatuma saniatigut illuatungeriit isumaqatigiinnissamut soorunami peqquneqarsinnaanngillat. Taamaalillunilu aamma oqaatigineqassaaq meerartaarnermut aningaasaateqarfik pillugu suliffeqarnermi illuatungeriit namminneq isumaqatigiinniarsinnaanerat siunnersuummik matuminnga itigartitsinikkut mattunneqanngimmat.

Tamatuma saniatigut immikkut oqaatigineqassaaq siunnersuut una meerartaarnermut aningaasaateqarfik pillugu qinigaaffiup siuliani siunnersuutigineqartumut assut assingummat; UKA 2010/38.

Siunnersuut taanna pillugu Ilaqutariinnermut Ataatsimiititaliaq isumaliutissiisummini ilaatigut ima allappoq:

”Siunnersuummittaaq siullermeerinninnermi tamakkiisumik ersepoq, meerartaarnermut atatillugu aningaasaateqarfik pillugu Inatsisartut inatsisissaattut siunnersuummik Naalakkersuisut saqqummiussinissaat pillugu pituttuisuusumik aalajangiisoqannginnerani apeqqutinik naliligassanik pingaarutilinnik qulaajagassanillu suliassarpassuaqartoq.

Aalajangiiffigisassatut siunnersuutip akuerineqarneratigut aningaasatigut kingunerisassai siunnersuuteqartumit allaaserineqarsimanngillat, soorluttaaq siunnersuummik siullermeerinninnermi pissutsit ersarinnerulersinneqarsimanngitsut. Meerartaarnermut atatillugu aningaasaateqarfik taarsiissuteqartarnermik suliaqartussaqaq pisariaqartitsineq naapertorlugu aningaasalersorneqartussaavoq. Tamanna sulisitsisut, sulisartut imaluunniit illuatungeriit taakku ataatsimoorlutik akiliuteqarnerisigut pisassaaq, soorluttaaq Namminersorlutik Oqartussat aalajangersimasumik annertussusilikkamik akiliuteqarsinnaasut. Tamanna pinsinnaavoq sulisitsisunik isumaqatigiinniarnikkut imaluunniit matumunnga atugassanik aningaasanut inatsisissami pingaarnersiuinikkut.

Oqaatigineqareersutut meerartaarnermut atatillugu aningaasaateqarfik qanoq kimillu aningaasalersorneqassanersoq siullermeerinnermi akissutissarsineqanngilaq. Aammattaaq Naalakkersuisut akissuteqaamminni qularutiginagu oqaatigaat meerartaarnermut atatillugu aningaasaateqarfik atuutilersinneqassappat kattuffiit meerartaarnermut atatillugu sulinngiffeqarnerup nalaani aningaasarsiaqartitsinissamik isumaqatigiissuteqareersut taarsiissutinik qinnuteqarumaartut. Meerartaarnermut atatillugu aningaasaateqarfik pillugu inatsisiliunneratigut aningaasatigut kingunerisassat nassuiaasiorneqarnerani tamanna aamma qulaajanernejartariaqarpoq.”

Siunnersuutip matuma sulissutigeqqinneqarsinnaanerani pissutsit Ilaqutariinnermut Ataatsimiititaliamit taakkartorneqartut ullumikkut suli soqutiginaateqarput. Qulequttalli taasissutissap killiligaanera pissutigalugu apeqqutit pingaarutillit taakku siunnersuummut matumunnga atatillugu suliarineqarnissaat ataatsimiititaliamit naleqquttutut isigineqanngilaq. Tassunga atatillugu 2014-imi aningaasanut inatsisissatut siunnersuummi nalinginnaasumik nassuiaatini immikkoortoq 5-imi aningaasatigut inassisimaneq pillugu nassuiaatit ataatsimiititaliamit innersuussutigineqassapput. Tassani ersarissumik allassimasutut oqaatigineqarsinnaavoq ingerlatsinnermut aningaasartuutit ingerlaavartut massakkut ukiuniluunniit aggersuni amerlineqarnissaanut Nunatta Karsiata aningaasaqarnera inissaqartitsinngitsoq. Tamatumalu peqatigisaanik Aningaasaqarnermut Siunnersuisoqatigiit nalunaarusiaat ataatsimiititaliamit aamma

eqqaasitsissutigineqassapput, taakkunani Nunatta Karsiata aningaasaqarnikkut ukiuni aggersuni unammilligassai ersarissumik nassuiaatigineqarput.

Suliniutissamut taperserneqanngitsumut tunngatillugu isumaqatigiinniarnissamut Naalakkersuisut peqquneqarnissaat siunertaqanngitsut amerlanerussuteqartunit isigineqarnera, tamatumalu peqatigisaanik Naalakkersuisut suliffeqarnermi illuatungiusunik peqateqarlutik periarfissanik misissuinissaannik ikinnerussuteqartut kissaateqarnerat inersuarmi oqallinnermi ersertoq ataatsimiititaliamit oqaatigineqassaaq.

Siunnersuutip aningaasaqarnikkut kingunerisassai

Siunnersuutip piviusunngortinneqarnerata aningaasatigut kingunissai Inatsisartut Suleriaasiat naapertorlugu siunnersuummi ilanngunneqarsimasut ataatsimiititaliamit maluginiarneqarpoq. Aningaasartuutaasussat killeqassasut nalilerneqarpoq, tassami aallaqqaammut pineqartoq tassatuaammat isumaqatigiinniarnarit aallartisarnerat. Meerartaarnermut aningaasaateqarfik kingusinnerusukkut piviusunngortinneqassagaluarpat aningaasartuutaasussat annertusinnaapput, tamatumani apeqqutaalluinnarpoq namminersortut kisimiillutik pilersitsissanersut imalluunniit pisortat namminersortullu aveqatigiillutik pilersitsissanersut.

Ataatsimiititaliap inassuteqaatai

Naak siunnersuutip siunertaanut isumaqataanertik Naalakkersuisut oqaatigigaluaaraat siunnersuut maanna ilusimisut iluseqartoq taperserneqanngilaq. Tamatuma peqatigisaanik Siumup Atassutillu Naalakkersuisut inassuteqaataat tassungalu tunuliaqutaasut taperserpaat. Isumaqatigiissutissat taamaalillunilu aamma meerartaarnermut atatillugu aningaasaqarnikkut atugassarititaasut pillugit isumaqatigiinniarnarit suliffeqarnermi illuatungeriinnut sapinngisamik annertunerpaamik isumagisassannngortinneqassasut Naalakkersuisut isumaqarput.

Tamanna tunngavigalugu ataatsimiititaliap isumaqatigiittup allannguutissatut siunnersuut imaattoq saqqummiuppaa:

Meerartaarnermut atatillugu aningaasaateqarfimmik pilersitsinissamik apeqqutip suliffeqarnermi illuatungeriit isumaqatigiinniarnissaanni aggersuni ilaatinneqarsinnaaneranut periarfissat misissorneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Meerartaarnermut atatillugu aningaasaateqarfiup sulisartut tamakkerlutik maanna ullormusiaqartitsinermi pitsaanerusumik atugaqalernissaat qulakkiissavaa.

Allannguutissatut siunnersuut saqqummiunneqartoq akuerineqassasoq **ataatsimiititaliap isumaqatigiittup inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Jens Immanuelson,
siulittaasoq

Gerhardt Petersen

Evelyn Frederiksen

Per Berthelsen

Naaja Nathanielsen

Hans Aronsen

Kuupik V. Kleist